

Giochen Bearth è il nov veterinari chantunal

■ (cc) La regenza grischuna ha nominà Giochen Bearth sco nov veterinari chantunal e nov manader da l'uffizi per la segirezza da victualias e per la sanadad d'animals. El surpiglia sia funcziun il 1. da schaner 2019. Giochen Bearth ha 57 onns ed è creschi si a Sumvitg. Suenter ses studi da medischina veterinara a Friburg ed a Turig ha el lavorà sco assistent da la facultad da medischina veterinara da l'università da Turig. Suenter sia dissertaziun ha el pratigà durant passa 20 onns en sia pratica da veterinari a Sumvitg. Ultra da quei ha el er exequi ina funcziun uffiziala sco veterinari districtual per il chantun Grischun ed è stà a temp parzial manader da la partiziun «servetschs veterinars» tar la citad da Turig.

Successur da Rolf Hanimann

Dapì il matg 2010 lavura Giochen Bearth sco substitut da veterinari chantunal tar l'uffizi per la segirezza da victualias e per la sanadad d'animals dal chantun Grischun. El daventa successur da Rolf Hanimann che va en pensiun il cumentament da l'onn 2019 suenter in'actività da bundant 11 onns sco veterinari chantunal e sco manader da l'uffizi.

L'uffizi per la segirezza da victualias e per la sanadad d'animals (USVA) surveglia l'entira chadaina da victualias – davent da la produziun da las substanzas primaras fin al product che vegn vendì. En il rom da l'execuziun dal dretg veterinari e da la legislaziun da victualias ha el l'incumbenza da proteger las consumentas ed ils consuments da ristgas per la sanadad e d'engions en connex cun victualias. Plinavert exequescha l'uffizi las prescripziuns davant la proteziun dals animals. La finala ademplescha el ulteriuras



Giochen Bearth, il nov veterinari chantunal.

incumbensas executivas che han in connex cun la segirezza da victualias e cun la sanadad d'animals e che servan a la proteziun da las consumentas e dals consuments, uschia en il sector da la legislaziun davant las substanzas chemicas, en il sector da la legislaziun davant la proteziun

cunter radiazions concernent il radon sco er en il sector dal commerzi en detagl cun bavrondas destilladas. Actualmain occupa el var 70 collavuraturas e collavuraturas. L'onn 2016 ha il USVA ultra da quei surpiglià incumbensas executivas per il chantun Glaruna en quests secturs.

■ PLAID PER LA DUMENGIA

Jesus gie, baselgia na

LUZI BATTAGLIA-SIGRIST,
PLEVON PENSIONAU, FARSSCHNÖ

Dapi entgins onns san ins udir savens la parola: «Jesus gie, baselgia na!» Ins savess era gir cun auters plaid: «Nus setenin vid Jesus – cun la baselgia havein nus nossas misergias!» Tgei eis'ei schabegiau cun Jesus ella baselgia, sch'el ei d'anflar plitost ordeifer quella, ch'en ella? Ins gi ch'ils poets e scribents seigien ils cars-tgauns ils pli sensibels. Els seigien quels che sentien il meglier tgei che se-reghegi el pli profund intern dil singul carstgaun, mo era el pli zuppau dalla societad umana. Aschi distanziau che biars poets e scribents dad oz scrivan sur dalla instituziun dallas baselgias, il tun semida denton, cura ch'els vegnan dumandai suenter lur relaziuns tier Jesus. Cheu san ins udir: Encunter Jesus sa atgnamein negin haver entzategi. En Jesus san ins anflar in ver exempel per la moda maniera d'ina veta da vera cuminonza denter ils carstgauns. Siu priedi sil cuolm seigi la pli impurtanta perdetga da quei fatg. E lu san ins leger ed udir, Jesus seigi il cunterpol dil Prometheus, il sogn da nies temps, igl idol d'in tschen-taner determinaus dalla tecnica. In auter gi che Jesus figureschi per el la persuadida resistenza encunter la destrucziun ch'il carstgaun caschuni a sesez. Igl enconuschent scribent e plevon Kurt Marti par

exempel sustastreha la evidenta muntada da Jesus surtut per quei ch'el anfla en Jesus ina sintesa gartegiada denter il feminin ed il masculin. Jesus representi la vart cordiala e migeivla, mo era la vart decidida e perschadida. Per nus sco representants dalla baselgia vul quei gir, baselgia sa buc mo esser quei che schabegia en baselgia ni en locals pagai e manteni dalla baselgia. Per che la baselgia seigi in segn da speranza, astgan lur representants buca sefatschentar mo cun sesez. Mo era quei ei getg. La buna nova da Jesus Cristus entseicha cul salid e buc cul selamentar cun schliats ch'ils temps dad oz seigien e che negin s'intresseschi pli per quei ch'ins lessi gir sco plevon. Mo tgi che tschontscha il lungatg dalla speranza e dalla carezia, gi Jesus, tschontscha in lungatg che min-tgin capescha e che mintgin brama el funs da siu cor. Ed era quei ei da gir, tgi che tschontscha il lungatg dalla speranza, quel quenta era buc ch'el seigi nunremplazzabels e ch'el stoppi purtar sulet il mund sin sias spatlas. Deus elegia magari il pign e fleivel, per far seturpegiar quel che se presenta sco grond els eglis dil mund, gi igl apostel Paulus en ina da sias brevs. E lu eis ei era da gir, il lungatg dalla spronza ei in lungatg che ha adina era in tec humor, in lungatg che deliberescha da temas ed anguoschas.

Mario Pacchioli dat «Remas» a Cuera

■ Sonda, ils 26 da matg, presenta el ensemble cun la Kammerphilharmonie Grischun e cun il chor «La Chanson de Fribourg» si'ovra sinfonica el Teater dil marcàu da Cuera. Per quei concert ha el tscharni 21 canzuns ch'el ha compunni sin basa da poesias romontschas. Ensemen cun Bruno Cathomas ha el luvrau vid l'interpretaziun da quella ovras.

Quei concert, ed in di avon quel a Fribourg, ein il resultat dil project cultural «Remas» che marchescha sia entschatta igl onn 2014. Mario Pacchioli ha presentau composiziuns per cant ed orchester sinfonic sin basa da poesias romontschas da poets sursilvans dil 19avel e 20avel tschentaner. 2017 han la Chasa Editura Rumantscha e «Remas Productions»

ediu in cudisch ed in disc cumpact. Il cudisch ei cumpariun en treis lungatgs: romontsch, tudestg e franzos. Quei possibiltescha in'avertura ed ina capientscha envien la Svizra tudestga e particularment la Svizra franzosa, interessada dal haver in access alla cultura romontschas. Ina fritegiva collavuraziun cul cantun da Fribourg ei stada il resultat.

Sco segn da lur engaschament politic per la coesiun nazionala, e pertscherts che quei ei in bein essenzial per nossa tiara, han ils presidents dallas Regenzas dil Grischun e da Fribourg, Mario Cavigelli e Georges Godel, ensemen cun il president dil Cussegl nazional, Dominique de Buman, surpriu il padrinadi da «Remas». Quei projects seigi predestinaus per in

brat cultural e la capientscha vicendeivla.

Il concert a Cuera includea, sper las canzuns solisticas da Mario Pacchioli, era novas composiziuns da Pacchioli scrites per il chor «La chanson de Fribourg», medemamein sin poesias romontschas. Jérôme Kubin, il dirigent oriund da Fribourg, diregia la Kammerphilharmonie Graubünden.

Concert e prevendita
Sonda, 26 da matg 2018, 19.30 h, teater Cuera.
Mario Pacchioli REMAS / Poesias romontschas per cant ed orchester sinfonic Kammerphilharmonie Graubünden
Chor La Chanson de Fribourg
Prevendita da biglietti: teater Cuera per telefon 081 252 66 44 ni online www.theaterchur.ch



Mario Pacchioli concertescha ensemen cun la Kammerphilharmonie Grischun e cun il chor «La Chanson de Fribourg».

■ NOVITADS WWW.RTR.CH

Dapli gudogn per l'Ospital chantunal il 2017

L'Ospital chantunal dal Grischun ha nudà in legraivel onn da gestiun cun in gudogn da 30 milliuns francs. Quai è in plus da 4 milliuns francs cumpareglia cun l'onn avant. La siveuta è s'augmentada il 2017 per 10 milliuns francs sin 345 milliuns francs. En total ha l'Ospital chantunal a Cuira tractà l'onn passà 17'461 pazientas e pazients staziunars. Cumpareglia cun l'onn avant è quai in lev minus da 0,93%. Percunter en ils cas ambulants s'augmentads per radund 6,6% sin 75'586. Vitiers hai dà 1063 natschientschas. Quai ha communigà l'Ospital chantunal dal Grischun. Sco quai che l'ospital scriva vinavant, giuaidan la scolaziun e la furnaziun ina gronda stima. Radund in quart dal persunal haja fatg l'onn passà ina scolaziun u ina furnaziun. Il 2017 ha l'ospital era pudi festivar ina medaglia d'aur. La collavuratura Irina Tuor è vegnida campionesa mundiala als «World Skills» ad Abu Dhabi en la sparta sanadad e gira. Era la construcziun dal bajetg nov, la chasa H1, saja sin buna via. Ins quintia da pudair retrair il bajetg l'atun 2019.

Plazzal da fabrica entamez Chiavenna

La festa da chant chantunala Rezia cantata ha lieu en trais emnas «extra muros» a Chiavenna. La citad sa prepara per quest eveniment extraordinari e vul sa mussar da sia meglra vart. In pitschen sbagl da bellezza vegn la citad ad avair – il Parco Pratogiano è actualmain in plazzal da fabrica. Il Parco Pratogiano è in lieu partucular per Chiavenna. Tant pli impurtant

ta è per ils responsabels la renatalisaziun dal parc, in project da radund 450'000 francs. Spustar ni era interromper las lavurs pervi da la festa da chant chantunala dal Grischun n'era betg pussaivel. Perquai ston las chantaduras ed ils chantadurs viver cun quest plazzal da fabrica entamez la citad e tschertgar auter lieu cun sumbriva per star patgific.

Anc èsi da suttascriver a maun

Il cussegl federal ha refusà da stgaffir la basa legala per rimnar suttascripziun per iniziativa e referendum online. Uschia propona il cussegl federal al parlament da refusar la moziun dal cusseglier nazional Franz Grüter da la partida populara dal chantun da Lucerna. I servia a la proteziun da maldiever sch'ins haja da suttascriver a maun, accentuescha il cussegl federal. A lunga vista vul el dentant pussibilitar la suttascripziun elettronica. Suententer avair introduci il votar electronic saja e-collecting previs sco terz etapda da Vote elettronica, scriva la regenza en sia resposta a la moziun.

Test da sirenas extraordinari

Suententer il test da l'entschatta favrer ha l'Uffizi federal per la proteziun da la populaziun curregi il sbagls. Per pudair testar e cumprovar la funcziun da l'entir sistem d'alarm vegn l'alarm repeti en l'entira Svizra. Ils 23 da matg ha perquai lieu in test da sirenas extraordinari en l'entir pajais. Tar il test dals 7 da favrer hai dà in problem tecnic cun il cumond a distanza. I sa tracta d'in problem da software ch'era già vegni identifigà il favrer suenter l'ultim test.